



**Komunikadu Imprensa**  
**Parlamentu Nasionál**  
**12 Jullu 2018**

**JSMP apresia inisiativa Bankada Fretilin no Partidu Demokrátiku ne'ebé apresenta  
Projetu Lei Anti-Korrupsaun ba Meza Parlamentu Nasionál**

JSMP apresia inisiativa Bankada Fretilin no PD ne'ebé apresenta ona Projetu Lei Anti-Korrupsaun ba Meza Parlamentu Nasionál iha Segunda-Feira 09 Jullu 2018.

Lihusi plenária Parlamentu Nasionál bankada rua ne'e hato'o Projetu Lei Anti-Korrupsaun ba Meza Parlamentu Nasionál ne'ebé simu direktamente husi Prezidente iha Ezersisú Deputada Maria Angelina Lopes Sarmento, atuálmente nu'udar Vice-Prezidente Parlamentu Nasionál.

“JSMP apresia tebetes ba inisiativa bankada rua ne'e tanba tau duni importánsia ba preokupasaun públiku nian durante ne'e hodi aselera prosesu diskusaun ba esbosu Lei Anti-Korrupsaun ne'ebé kaduka tiha ona iha lejjzlatura rua liuba kotuk”, dehan Diretór Ezekutivu JSMP, Luis de Oliveira Sampaio.

Inisiativa ne'e nu'udar jestu polítiku ne'ebé hatudu katak partidu rua ne'e kumpri sira-nia kompromisú política iha kampaña eleitorál iha Eleisaun Antesipada 2018 nian atu luta kontra korrupsaun liuhosi haforsa tan kuadru legál sira hanesan Lei Anti-Korrupsaun. Ida-ne'e mós hatudu katak bankada rua ne'e iha kapasidade atu kaptura no interpreta espetativa no vontade populár maioria povu nian katak Lei Anti Korrupsaun ne'e importante atu prevene no kombatatividade korrupsaun iha Timor-Leste, promove boa-governasaun no asegura bein-estar ba sidadaun hotu-hotu.

JSMP husu ba partidu polítiku sira hotu iha PN liuliu koligasaun partidaria AMP ne'ebé kompostu hosi Partidu CNRT, PLP no KHUNTO no koligasaun partidaria seluk atu apoiu inisiativa ne'e no lori Projetu Lei Anti Korrupsaun atu ba diskuti no aprova iha tinan primeriu lejjzlatura dalimak nian.

Antes ida-ne'e JSMP<sup>1</sup> mós husu ona ba deputadu eleitu sira iha lejjzlatura dalimak ne'ebé simu pose iha 13 Juñu 2018, atu aprova Projetu Lei Anti Korrupsaun imediatamente sein adiamentu

---

<sup>1</sup> Komunikadu Imprensa JSMP iha: [http://jsmp.tl/wp-content/uploads/PrPWPParlamentuNasionalDALIMAK\\_TETUM.pdf](http://jsmp.tl/wp-content/uploads/PrPWPParlamentuNasionalDALIMAK_TETUM.pdf) ka bele mós vizita JSMP ninia Facebook page iha: <https://web.facebook.com/notes/jsmp-timor-leste/deputadu-eleitu-sira-iha-lejjzlatura-dalimak-tenke-dezenvolve-programa-nasionál-/1365361653607475/>

ne'ebé la-nesesáriu liuhosi dezenvolve Programa Lejislativu Nasionál no hatuur Projeitu Lei Anti Korrupsaun hanesan prioridade ida-ne'ebé aas-liu projetu lei sira seluk.

Durante ambiente kampaña eleiorál eleisaun antesipada nian, JSMP mós organiza debate públiku<sup>2</sup> ida-ne'ebé envolve partidu polítiku sira ne'ebé kompete ihe eleisaun antesipada 12 Maiu 2018. Iha debate públiku ne'e, representante partidu polítiku sira manifesta sira-nia komitmentu no kompromísu atu aprova Projeitu Lei Anti Korrupsaun bainhira sira hetan asentu iha Parlamentu Nasionál.

Projeitu Lei Anti Korrupsaun ne'ebé bankada rua ne'e propoin konstitui Kapítulu 4. Kapítulu I prevee kona-ba dispozisaun penál, Kapítulu II prevee kona-ba dispozisaun prosesuál penál, Kapítulu III prevee kona-ba partisipasaun públiku no Kapítulu IV prevee kona-ba dispozisaun finál.

Kapítulu I konstitui hosi provizaun sira ne'ebé define kona-ba aktu korrupsaun ne'ebé regula iha artigu 192, 274, 275, 281, 287, 288, 290, 292, no artigu 299, 314 i artigu 319 Kodigu Penál no aktu krime korrupsaun sira ne'ebé la regula iha Kodigu Penál mak hanesan faktu sira ne'ebé halo ne'e fora husi territóriu nasional, responsabilidade kriminál husi pesoa kolektiva, pena aplikavel ho nia atenuasaun espesiál ba penál sira inklui krime enrikesamentu ilísitiu no fraude iha konstrusaun.

Kapítulu II konstitui hosi provizaun sira ne'ebé define kona-ba karáteristika prosesu, devér kolaborasaun, investigasaun, representasaun iha pesoa kolektiva ho nia prosesu, denúnsia anónima, buska no revista, aprensaun, asesu espesiál ba komunikasaun, konjelamentu no konfisku sasán sira ne'ebé la loos, segredu bankáriu, defeza direitu terseira parte ho boa fé, protesauun testemuña nian, detensaun fora husi flagrante delitu, asaun kompensasaun no arguidu nia mate no asaun sivíl.

Kapítulu III define kona-ba públiku nia partisipasaun iha kombate korrupsaun no rekoñesimentu Estadu nian ba ema sira ne'ebé kontribui ba prevene ho halakon korrupsaun. Enkuantu Kapítulu IV define kona-ba oinsa atu Governu bele kria fali regulamentu própriu ida ne'ebé prevee kona-ba norma no prosedimentu partisipasaun públiku nian iha prevensaun no kombate korrupsaun bainhira lei ne'e tama iha vigór.

Deputadu Proponente sira mak husi Bankada Fretilin Deputadu Aniceto Longuinhos Guterres Lopes, David Dias Ximenes “Mandati, Francisco Miranda Branco, Antoninho Bianco, Lúdia Norberta dos Santos Martins, Nélia Soares Menezes no Joaquim dos Santos. Enkuantu proponente husi Bankada PD representa husi deputadu Adriano do Nascimento.

---

<sup>2</sup> Informasaun debate publiku kona-bab “IMPORTÁNSIA LEI ANTI KORRUPSAUN IHA TIMOR LESTE” iha <https://www.facebook.com/notes/jsmp-timor-leste/jsmp-realiza-debate-nakloke-kona-ba-importansia-projetu-lei-anti-korrupsaun/1315890051887969/>

JSMP rekomenda ba Meza Parlamentu Nasionál atu fó prioridade másimu ba esbosu lei refere hodi bele admite no tau iha planu lejizlasaun Parlamentu Nasionál nian iha primeiru sesaun lejizlativa hodi diskuti no aprova.

Atu hetan informasaun liután favor kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.tl](mailto:luis@jsmp.tl)  
[www.jsmp.tl](http://www.jsmp.tl)